

**INATSIARTUT
OMBUDSMANDIATA
UKIUMOORTUMIK
NALUNAARUTAA
2006**

4-3 Sulianik isumaginninnermut tunngasunik misissuineq (J.nr. 11.73.88.-
71/045-06)

Sulianik isumaginninnermut tunngasunik K Kommunimi misissuininnut atatillugu ataatsimut oqaaseqaatinik imaattunik allakkani 26. maj 2006-imeersuni saqqummiussivunga:

"Malugaara kommunimi suliat isumaginninnermut tunngasut qulequtakkaartunut agguataagaasut.

Taamaalillunga suliat suliassa qarfinnit ukunaneersut tigoorarpakka: Suliat pisortanit ikiorsiissutinut tunngasut, suliat meeqqanut inuusuttunullu tunngasut aamma suliat soraarnerussutisianut tunngasut.

Kommunimi isumanginninnermik ingerlatsiviup pisortaata tikeraarninni oqaatigaa ingerlatsivimmi sulisut taarseraattuarsimasut, suliassa qarfiullu piffissat ilaanni sumiginnarneqartarsimanera tamatuma nassatarisimagaa, isumaginninnermilli ingerlatsiviup pisortaata suliassa qarfiusut ataasiakkaat massakut misissulersimagai sulianillu torersaalersimalluni.

Paasissutissiissutigineqartut tusaatissatut tiguakka, tamatumunngalu peqatigitillugu oqaatigalugu uanga paasinninnera unaasoq pingaartumik suliat pisortanit ikiorsiissutinut tunngasut sukumiisumik misissorneqarnissaat pisariaqartinneqartoq.

Tamatuma saniatigut malugaara suliani soraarnerussutisianut tunngasuni ataasiakkaani inummut tapinik qinnuteqaatit kommunip itigartittarsimagai, qinnuteqarnissamat piffissaliussap kommunimit aalajangersarneqarsimasup qaangerneqarsimanagera innersuussutigalugu, piffissaliussarlu taanna kommunip missingersuutini inummut tapinut atugassatut immikkoortissimasaasa atorneqartarnerannut attuumassuteqartoq.

Tamanna pillugu oqaatigaara pisortanit pensionisiat pillugit Inatsisartut peqqusutaanni nr. 9-mi, 15. april 2003-meersumi § 14, imm. 1-ikkut aalajangersarneqartoq inummut tapit ataasiakkaat pisariaqartitsinerannik nalileereernikkut tunniunneqartassasut. Tassa imaappoq kommunip inummut tapinik aqutsinermini missingersuutini isiginninniarnera inatsisinik unioqquitsinerusoq, qinnuteqarnissamullu piffissaliussat, qaangerneqarneri imminni inummut tapinik itigartitaanernik kinguneqartut, kommunip aalajangersarsinnaanngikkai.

Kommuni qinnuigaara ajornartorsiut taanna pillugu oqaaseqaatini uannut nalunaarutigeqqullugit.

Tamatuma saniatigut suliat misissorneqartut ilarpaaluini matumunnga assersuutissaqarpoq, tassalu kommunip naammagittaalliornissamat periarfissanik innuttaasunut ilitsersuigaangami oqaatigisarsimagaa aalajangiineq pineqartoq kommunalbestyrelsimut naammagittaalliutigineqarsinnaasoq.

Isumaginnittoqarfiup aqunneqarnera aaqqissuusaaneralu pillugit Inatsisartut peqqusutaanni nr. 11-mi, 12. november 2001-imeersumi § 8-kkut aalajangersarneqarpoq naammagittaalliut Isumaginninnermi Naammagittaalliuteqartarfimmu tunniunneqassasoq.

Taamaattumik inassuteqaatigaara kommunip siunissami naammagittaalliornissamut ilitsersuisarnini tassunga naapertuuttunngortissagaa.

Suliani ataasiakkaani - pingaartumik suliani kommunip soraarnerussutisiaqartunut inummut tapinik akuersissuteqarfigmaani - aamma maluginiarpara kommunip aalajangiinerit Isumaginninnermi Naammagittaalliuteqartarfimmuut naammagittaalliornissamut periarfissaqarneranik ilitsersuummik ilaqartinneq ajorai.

Tamanna pillugu oqaatigaara suliassat suliarineqartarnerat pillugu inatsimmi § 25-kkut aalajangersarneqarmat innuttaasoq tamakkiisumik akuersaarneqanngippat aalajangiineq naammagittaalliornissamut periarfissaq pillugu ilitsersuummik kommunip ilaqartittassagaa.

Suliani isumaginninnermi tunniunneqartartut assigiissaartunik tunngaveqartunik tunniussiviusuni innuttaasup akuersaarneqarnera taassallugu pissutissaqanngilaq, innuttaasup pineqartup aningaasat taamatorpiaq amerlassuseqartut qinnutigisimanngippagit. Ilitsersuisussaataanerme innuttaasup pineqartup qinnutigineqartunik pinsinnaatitaaneranik kommunip naliliinera apeqqutaanngilaq."

Kommunip e-mailikkut nassiussakkut 7. november 2006-imeersukkut nalunaarfigaanga kommunip 15. december 2006 nallertinnagu akissuteqarsinnaanissani neriutigigaa.

Kommunip akissutaanik ukiup nalunaarusiuunneqartup naanerani sulii tigusaqanngilanga.
